

ԱՐՁԱՆԱԳՐՈՒԹՅՈՒՆ

Ավշար բնակավայր

30.04.2025 թ.

2025 թվականի ապրիլի 30-ին՝ ժամը 11:00-ին, «Շրջակա միջավայրի վրա ազդեցության գնահատման և փորձաքննության մասին» օրենքով և Կառավարության 2023 թվականի դեկտեմբերի 28-ի N 2343-Ն որոշմամբ սահմանված կարգով, Արարատի մարզի Արտաշատ համայնքի Ավշար բնակավայրի վարչական ղեկավարի նստավայրում տեղի ունեցավ «Օրինք սթոն» ՍՊԸ-ի կողմից փորձաքննության ներկայացված՝ Արարատի մարզի Արարատի տրավերտինների և կավերի հանքավայրի «ՄՈՒԼՏԻ ԳՐՈՒՊ ՍԹՈՈՒՆ» տեղամասի արդյունահանման աշխատանքների շրջակա միջավայրի վրա ազդեցության գնահատման հաշվետվության վերաբերյալ հանրային 2-րդ լսումը:

Բացման խոսքով հանդես եկավ Արարատ համայնքի ղեկավար Ասլան Ավետիսյանը, այնուհետև խոսքը փոխանցեց «Շրջակա միջավայրի վրա ազդեցության փորձաքննական կենտրոն» ՊՈԱԿ-ի գլխավոր մասնագետ Քրիստինե Հարությունյանին: Հարությունյանը նշեց, որ փորձաքննության գործընթացն իրականացվում է «Շրջակա միջավայրի վրա ազդեցության գնահատման և փորձաքննության մասին» օրենքով (այսուհետ՝ Օրենք) սահմանված կարգով և ներկայացրեց փորձաքննության գործընթացը, նշեց, որ փորձաքննության գործընթացին մասնակցել են պետական կառավարման մարմինները, տեղական ինքնակառավարման մարմինները և ՇՄՆ ստորաբաժանումները, խոսեց նախատեսվող գործունեության արդյունքում շրջակա միջավայրի վրա հնարավոր ազդեցությունների և բնապահպանական ռիսկերի մասին: Հարությունյանը նշեց, որ համաձայն Օրենքի՝ օգտակար հանածոյի արդյունահանումը հանդիսանում է «Ա» կատեգորիայի գործունեության տեսակ, քանի որ ունի ազդեցության ավելի մեծ ազդեցության աստիճան շրջակա միջավայրի բաղադրիչների վրա: Նա նշեց, որ նախաձեռնողը ՇՄԱԳ-ում նախատեսել է մի շարք մեղմացուցիչ միջոցառումներ, որոնք հնարավորություն կտան մեղմելու և նվազեցնելու հնարավոր ազդեցությունները: Հարությունյանը ներկայացրեց ՇՄՆ ԲՀՊՏ և կենսաբազմազանության վարչության, ԳԱԱ Թախտաջյանի անվան բուսաբանության ինստիտուտի և հիդրոէկոլոգիայի և կենդանաբանության գիտական կենտրոնի կարծիքները՝ կապված հայցվող տարածքում հանդիպող կարմիրգրքյան բուսատեսակների և կենդանիների հետ: Վերջինները նպատակահարմար չեն համարում ընդերքօգտագործումը նշված տարածքում: Նախաձեռնողի ներկայացուցիչները նշեցին, որ ներկայացրել են մասնագիտական եզրակացություն նշված կարմիրգրքյան տեսակների վերաբերյալ, սակայն Հարությունյանը նշեց, որ ներկայացված եզրակացությունը բավարար չէ, որպեսզի հերքվի նշված տեսակների առկայությունը հայցվող

տարածքում, քանի որ հենց եզրակացության մեջ էլ նշված էր, որ անհրաժեշտ է իրականացնել լրացուցիչ հետազոտություններ: Նա նշեց, որ տնտեսական զարգացումը շատ կարևոր է մեր երկրի համար, սակայն անհրաժեշտ է հաշվի առնել նաև բնապահպանական օրենսդրությունը և հարցին տալ այնպիսի լուծումներ, որի արդյունքում շահի տնտեսությունը՝ չվնասելով բնությանը: Քննարկման արդյունքում, հաշվի առնելով նաև տնտեսական զարգացման հնարավորությունը, սոցիալական սպասվող աջակցությունները ազդակիր համայնքին, առաջարկություն ներկայացվեց տարածքում կատարել լրացուցիչ հետազոտություններ՝ համայնքի, նախաձեռնողի և «ՇՄԱՓԿ» ներկայացուցիչների և համապատասխան մասնագետների մասնակցությամբ:

Հարությունյանը նշեց, որ Օրենքի պահանջով կազմակերպվել է հանրային 2-րդ լսում, որի նպատակն է ազդակիր բնակավայրին և այլ շահագրգիռ անձանց մասնակից դարձնել փորձաքննության գործընթացին և լսել նաև նրանց կարծիքները: Նա ներկաներին տեղեկացրեց, որ առաջարկություններ ունենալու դեպքում կարող են դրանք ներկայացնել բանավոր կամ ուղարկել «Շրջակա միջավայրի վրա ազդեցության փորձաքննական կենտրոն» ՊՈԱԿ-ի պաշտոնական էլեկտրոնային փոստին և խոսքը փոխանցեց նախաձեռնողի ներկայացուցիչներին:

Նախաձեռնողի ներկայացուցիչ Գուրգեն Հակոբյանը ներկայացրեց նախատեսվող գործունեության վերաբերյալ ընդհանուր տեղեկություններ, ներկայացրեց աշխատանքների կազմակերպման միջոցառումները և շահագործման փուլում նախատեսվող աշխատանքները: Նա ներկայացրեց հանքարդյունահանման ընթացքում նախատեսվող բնապահպանական ռիսկերի նվազեցմանն ուղղված նախատեսվող միջոցառումները՝ մթնոլորտային օդի, ջրային ռեսուրսների, հողի հետ կապված: Նա նշեց, որ բոլոր ազդեցությունների համար մշակվել են համապատասխան մեղմացնող միջոցառումներ, օրինակ, պարբերաբար իրականացվելու է ջրցան և այլն: Կարմիրգրքյան տեսակների վերաբերյալ նշեց, որ հնարավորություն չի եղել իրականացնել լրացուցիչ հետազոտություններ, քանի որ լրամշակման համար տրամադրված ժամանակը բավարար չէ: Հարությունյանը նշեց, որ լրամշակման համար տրամադրված ժամկետը բխում է Օրենքի պահանջից և դա հնարավոր կլինի փոխել միայն օրենսդրական փոփոխությունների արդյունքում:

Արարատ համայնքի ղեկավար Ասլան Ավետիսյանը նշեց, որ ընկերությունը պարտավորվել է համայնքին ու հենց ազդակիր բնակավայրին ցուցաբերել տարբեր բնույթի աջակցություն՝ սկսած ֆինանսականից մինչև սոցիալական և տեխնիկայի տեսքով:

Նախատեսվող գործունեության վերաբերյալ տեղեկատվությունը ներկայացվելուց հետո Հարությունյանը խոսքը փոխանցեց ներկաներին՝ իրենց առաջարկությունները, դիտողությունները ներկայացնելու և հուզող հարցերը հնչեցնելու համար:

Բնակիչների կողմից հարցեր չհնչեցին:

Քննարկվեցին նաև ազդակիր համայնքի բնակիչներին աշխատանքով ապահովելու և գործունեության հետ կապված այլ հարցեր:

Քննարկման ավարտին համայնքի ներկայացուցիչները նշեցին, որ անհրաժեշտ է իրականացնել լրացուցիչ հետազոտություններ կապված կարմիրգրքյան տեսակների հետ, ինչը նաև նախադեպ կհանդիսանա հետագայում, նմանատիպ գործունեության տեսակներին նախնական համաձայնություն տրամադրելիս:

Ք. Հարությունյանը ամփոփեց հանրային լսումը և շնորհակալություն հայտնեց ներկաներին:

Հանրային լսմանը մասնակցում էին ազդակիր համայնքի բնակիչներ, Արարատ համայնքի ղեկավարը, ներկայացուցիչներ, Ավշար բնակավայրի վարչական ղեկավարը և նախաձեռնողի ներկայացուցիչները:

Հանրային լսման լուսանկարները կցվում են սույն արձանագրությանը:

Վարող և քննարկումների պատասխանատու՝

Ք. Հարությունյան

«Օրիենթ սթոն» ՍՊԸ-ի ներկայացուցիչ՝

Գ. Հակոբյան